



*Kamis, 11 Pebruari 2021*

**Ogen: 2 Korinti 4:16-18**



**Teptep Wari Ipelimbarui**



*Menjadi seorang Kristen lebih dari sekedar pertobatan. Tapi merupakan proses setiap hari di mana anda bertumbuh terus menjadi seperti Kristus (Billy Graham).* Adi bas teks renungenta ndai nina, teptep wari ipelimbarui. Ertina kalak Kristen e lalap iperoses gelah jadi seri ras Kristus. Bas kai kita iproses? Nina Paulus, daging kula enda desken bejana tanah liat, lit keterbatasenna, banci pecah ras la tahan ndekah. Kula enda reh dekahna reh burukna tapi kiniteken kami man Kristus e lalap ipeteguhi. Jadi kalak Kristen e iproses i bas erkiniteken man Tuhan Jesus. Tambah warina reh rembakna ras Kristus. Perayakenna lanai terjeng doni enda ngenca, sebab enggo iangkana kai si lit bas doni enda kerina barang si banci macik, lesap ras bene rasa lalap. Kiniteken man Tuhan Jesus me dalanna ndatken kegeluhen si rasa lalap. Aminna lit kiniseran i bas ndalani kiniteken e lanai mobah ukur, nina Paulus reh buena kiniseran e, reh gegehna ngikutken Jesus e. Rikutken pengalamen Paulus maka labo akapna mberat kiniseran si reh nderpa ia, ibandingkan ras kegeluhen si rasa lalap si enggo nimai ia. Em dalan-dalanna maka nina kami labo natap kempak si teridah tapi kempak si la teridah, sebab si teridah enda kentisik ngenca tapi si la teridah e tahan rasa lalap. Arah pengalamen kiniteken Paulus enda ibabai kita maka la kepe cukup kita enda jadi kalak Kristen si ninta Tuhan Jesus juruselamatku. Tapi selaku kalak Kristen kita pang ngenanami kiniseran, lako empertahanken kiniteken, nggit nuduhkan kebenaren kata Dibata e subuk bas pendahin, jabu, ras masyarakat. Tetap ermeteruk ukur ras nggit ngalemi salah bagi Kristus. Perayaken kalak kristen e labo doni enda tapi kegeluhen pertendin si tahan rasa lalap. Perayaken e min siperlu tetap ipelimbarui gelah reh paguhna tiap wari. *Kegeluhen si rasa lalap eme jadi perayaken.*